



Nuuk 14. november 2011

Inatsisartut suleriaasiat § 37 naapertorlugu Naalackersuisunut apeqqut:

Inatsisartuni ilaasortaq Ruth Heilmann Siumut

**Tunnngavilersuut:**

Isumaginninnermik Naammagittaalliuuteqartarfiup sullissinnermik ingerlatsinera pillugu nassuiaat UKA 2009 Inatsisartunut Naalackersuisut saqqummiuppaat. Taamanikkut Naalackersuisut saqqummiussigamik inatsisartunut neriorsuutigaat misissueqqissaartoqassasoq, kingornatigullu iliuuserisassamik pilersaarusiorniartutik taannalu upernaakkut 2010-mi inatsisartunut saqqummiunneqarumaartoq, inatsisiliornissamillu malitseqartitsiniartutik UKA 2010-mi inatsisartunut saqqummiutassaminnik. Taamanikkut inatsisartut tamarmik taamatut iliuuseqarnissaq isumaqatigilluinnarpaat. Ajoraluartumillu ulloq manna tikillugu neriorsuutit taamaattut pisimangillat.

Taamatut UKA 2009-mi nassuiaat inatsisartuni sammineqarami inatsisartut kissaatigaat Naammagittaalliuutit suliarineqartussat amerlanerujussuat pissusissamisoortuunngitsoq, taamaattumillu Naammagittaalliuutit ikilisarneqarnissaat siunertaralugu allaffimmi sulisut nukittorsarneqarnissaat anguniarneqassasoq. Taamatut nukittorsaasoqarnerata eqaallisaaneq malitsigisussaammagu sullitat piaarnerusumik naammagittaalliuutiminnik akissutisisarnissaat sullilluarneqarnerunissaallu. Aammalu inatsisartut tamarmik isumaqatigiissutaannik ileqquulernikuuvoq naammagittaalliuuteqarfiup inatsisartunut kommuninullu ukiut tamaasa nalunaarusiortarnera. Taamatut killiffimmi ukiumoortumik nalunaarusiortarneq Naalackersuisut attatiinnartariaqaraat isumaqarpunga inatsisartuni kommuninilu takussutissat saqqummiunneqartartut sulinitinnut isumalerujussuummata ingerlateqqinneqarnissaat pisariaqartutut isumaqarfignarpoq.

**Apeqqutit:**

1. **Sooruna Naalackersuisut UKA 2009-mi misissueqqissaarnermik malitseqartitsiniartutik aammalu UPA 2010-mi inatsisartunut iliuuserisassamik pilersaarutiminnik saqqummiussaqaarniarlutik neriorsuinertik maannamut ukiuni pingasunngulersuni suli eqqortissimangilaat ?**
2. **UKA 2009-mi Naalackersuisut UKA 2010-mut inatsisissamik saqqummiussaqaarniarlutik neriorsuutertik suli piviusunngortinngikkaat, sooruna ?**
3. **Isumaginninnermik Nammagittaalliuuteqarfiup ukiumoortumik nalunaarutaa qaqugu takoqqissavarput ?**
4. **2009-mi ukiakkut nassuiaatip suliarineqareernerani qanoq alloriartoqarpa. Sulisut inatsisilerituullu qassinik amerlippat aammalu naammagittaalliuutinik suliaqarneq qangarnit eqaannerulerpa, qassinillu ikileriaateqartoqarpa ?**
5. **Allaffissornikkut aningaasartuuteqarneq qanoq annertusiva ?**

6. **Naammagittaalliuutinik sullisineq pillugu Kommunit Namminersorlutik Oqartussat pikkorissaanernik ingerlatsisarnerat suli atuuppa ? Taamaangippat qaqugu pilersaarutaava ?**
7. **Innuttaasut atuisullu qanoq paasissutissinneqartigisarpat ?**
8. **Ullumikkut naammagittaalliuutit suliarineqanngitsut qassit utaqqisinneqarpat?**
9. **Kommunerujussuannortitsinerup kingorna naammagittaalliuutit qanoq misigisaqarfiuppat innuttaasut naammagittaalliuuteqartut eqqarsaatigalugit pisariinneruler-toqarpa imaluunniit qanoq ingerlasoqalarpa ?**
  
10. **Ullumikkut naammagittaalliuutaasartut sumut sammitinneqarneruppat ?**